

Analisa muossa co cuser la plaga

Ils problems finanziaals dil Spital regional Surselva creschan. Las delegadas ed ils delegai dalla corporaziun da vischnauncas Sana-Surselva han perpei decidiu mardis – sera a Falera da schar analisar e cussegliar ina firma externa da detschiert la structura dil Spital regional. La fin da mars 2025 duein ils resultats dall’analisa e dalla cussegliaziun esser avon maun e lu vegn la SanaSurselva a decider las mesiras co ei va vinavon cul spital.

MARTIN GABRIEL/FMR

Las delegadas ed ils delegai dalla corporaziun da vischnauncas SanaSurselva ein unanimamein dall’idea ch’ei va buc aschia vinavon cul Spital regional Surselva che scriva deficits mintg’onn. Ei sto dar midadas cul spital che stuess far investiziuns, mo che ha buc ils daners per far quellas. Il cantun ha gia fatg ina evaluaziun dallas structuras dil Spital regional el rom da sia planisaziun dils spitals 2026.

Las delegadas ed ils delegai dalla Sana Surselva vulan denton saver dapli. Il plenum dalla corporaziun da sanadad dallas vischnauncas vul era saver tgei ch’ei da midar. E perpei han ins decidiu mardis sera da surdar ad in’interpresa specialisada da Türitg l’incumbensa da far ina analisa ed ina cussegliaziun. «Quella analisa duei lu esser la basa per decider las mesiras ch’ein da prender», di *Patrick Schaniel* che ha menau sia emprema radunonza da delegai sco niev parsura dalla SanaSurselva. «Per garantir il provediment da sanadad en Surselva e per garantir las investiziuns planisadas duvrein nus ussa consequenzas finanziaalas transparentas.»

Tgei duvrein nus?

Patrick Schaniel ch’ei dapi quater meins president dalla Sana Surselva ha detg en discurs cun la FMR che la basa per far l’analisa decidida a Falera seigi la ferma perschasiun dallas delegadas e dils delegai ch’ei drovi in spital cun ina prestaziun adequata en Surselva per la populaziun e pil turissem. «La damonda ei mo, tgei che nus duvrein e tgei buc.» Mintga prestaziun dil spital hagi siu prezi. «L’analisa duei mussar d’ina vart ils prezis e da l’autra vart la tscherca dallas prestaziuns.» Las delegadas ed ils delegai dalla SanaSurselva vegnien a basa da quellas envestas a decider tgei prestaziuns e products ch’ins vegli promover e da tgeinins ch’ins sappi desister egl avegnir. Ils responbels dil Spital regional Surselva sustegnien cumpleinamein quell’analisa.

Niev spital ei in tema

El rom dallas discussiuns finanziaalas ei era il bassegn d’in niev Spital regional Surselva staus in



La radunonza da delegai dalla SanaSurselva ha decidiu il margis sera da schar analisar e cussegliar davart las stucturas dil Spital regional Surselva.

FOTO MARTIN GABRIEL

tema alla radunonza da delegai. Il cussegl d’administraziun dil Spital regional Surselva ei da l’avis ch’igl edifeci igl dil spital hodiern correspundi buca pli allas pretensiuns dad oz. In niev baghetg stoppi vegnir tratgs en consideraziun. Pil president dalla SanaSurselva, Patrick Schaniel ei quei ina pretensiun realistica. «La construcziun d’in niev spital ei in tema era tier nossas delegadas e delegai ed ei dat pliras variantas ch’ein vegnidas sclaridas. Nus stein cheu en ina fasa iniziala da planisaziun ed enteifer ina planisaziun da finanzas entochen igl onn 2028 vul quei dir ch’igl ei da far ils proxims onns fetg biara lavur d’informaziun e da comunicaziun denter ils differents gremis dil spital e dallas vischnauncas che pagassen lu gie era la gronda part dalla tuorta», di Patrick Schaniel. «E nus stuein haver il suveran che sustegn nus cun dir gie ad in credit per in niev spital.»

Dapli trasparenza

Dus delegai han fatg allusiun a Falera alla problematica dalla comunicaziun enteifer las discussiuns dil provediment da sanadad en Surselva. Ei detti biars gremis entuorn il spital regional e las organisaziuns da sanadad e vitier vegnien ils miedis da casa. La SanaSurselva stuessi comunicar cun includer tut ils acturs.

«Nus vesein la sfida e savein en tgei direcziun che la comunicaziun sto ir per che nus haveien success», di il niev president dalla SanaSurselva. «La suprastonza dalla SanaSurselva vesa ch’ei dat aunc potenzial da migliur. «El center stetti adina il carstgaun e sia sanadad», di Patrick Schaniel. E la buna lavur che vegni fatga els gremis hagi alla fin finala ina buna influenza silla lavur dil spital, sillas collaboraturas ed ils collaboraturs e silla contentientscha dallas pazientas e dils pazients.

Sminuir il deficit

Il spital regional scriva sco tut ils spitals cefras cotschnas. Il 2023 ha il spital da Glion fatg in deficit da 2,3 milliuns francs ed il 2022 muntava il deficit ad 1,4 milliuns. Il Spital regional Surselva ha giu dumandau la SanaSurselva per in agid da cuvierer ils deficits ed ils delegai dalla SanaSurselva han decidiu da sustener. Pigl onn 2025 munta quei in import da dus milliuns francs. Quella summa ei vegnida risguarda el preventiv 2025 dalla Sana Surselva ch’ei era vegnius deliberaus mardis-sera a Falera. (fmr/mg)

GLION



Il kiosk alla staziun da Glion vegn apparentamein insumma buca aviarts pli.

FOTO MARTIN GABRIEL

Insumma negin kiosk pli per la staziun da Glion

Il kiosk dalla staziun a Glion ei svanius per adina. Sco quei che l’interpresa Valora Management AG sco menadra dalla maiortad dils kioscs en Svizra ha rispundiu alla damonda dalla FMR, metti la Viafier retica a disposiziun negin spazi da vendita per in kiosk provisoric duront la construcziun dalla nova staziun da Glion. Ultra da quei seigi il contract pil kiosk era buca vegnius prolunghius cun la Valora Management AG suenter che la staziun nova seigi construida. La Viafier retica ha rispundiu alla FMR ch’ins hagi negin plaz per in kiosk provisoric duront il temps da construcziun. Ultra da quei drovi ins plaz avunda per deponer velos e per dismetter rumians. La vischnaunca Ilanz/Glion ha tenor il president communal Marcus Beer empruau senza success da perschader la Retica da staziunar in kiosk provisoriori duront il temps da construcziun che cuozza prevesibla-mein entochen igl atun 2027. (fmr/mg)

GLION

Concert da benefeci per Uniun Momo

Sonda, ils 16 da november 2024 ei a Glion, ell’aula ed ella halla da gimnastica, in’occorrenza gronda dall’uniun Momo. Quella vul porscher ad affons malsauns el Spital cantunal a Cuera ina assistenza che levgiescha lur sort e che gida da medegar. Igl ei affons da tuttas regiuns dil Grischun, affons che drovan tgira medicina-la sur in temps pli liung. Ad els ein ils concerts da benefeci a Glion dedicai. Il program entscheiva allas 14.00 cul Chor d’affons Sumvitg, culla gruppa da teater dalla scola da Favugn e culla band dalla famiglia Gnos da Vaz Sut. Pil program dalla sera ch’entscheiva allas 18.00 sunan las bands Panthalassa, Petta Pagada, No Future, Dario Hess & Band, sco era il DJ Kamaki. (fmr/abc)

Dapli infos mira www.vereinmomo.com

Il general ei egl archiv

Dacuort ha gl’Archiv cultural Foppa giu sia otgavla radunonza generala. A quella ha il scribent, columnist ed anteriur scolast Linard Candreia priu part. El ha surdau agl archiv denter auter in grond putret da general Mathias Murezi Padrun de Carné, oriund da Sagogn.

RTR/FMR

G’Archiv cultural Foppa (ACF) exista dapi varga otg onns. Incumbensa d’in archiv cultural eis ei da rimnar perdegas dalla cultura dalla regiun. Quei ein buc objects gronds, mobein documents, scartiras, actas, fotografias, brevs. Caussas plitost satellas. L’instituziun rimna tut quei ch’ei privat, respectiv d’uniuns, e buca gl’ufficial e dil maun public. Fatgs da vischnaunca s’audan egl archiv communal, fatgs privats egl archiv da cultura. Las vischnancas da Falera, Ilanz/Glion, Laax, Sursaiissa Mundaun, Sagogn, Schluein, sco era Breil per sia fracziun da Vuor, sustegnan generusamein gl’ACF cun lur commembradi. La vischnaunca Ilanz/Glion metta era a disposiziun la casa da scola per quei intent e sustegn gl’archiv nua ch’ei fa da basegns.

Cu ils emigrants tuornan

Naven dall’entschatta han donaturas e donaturs dau agl ACF rimnadas e relaschs giu dil surcombras ed ord stivau privatas. Bia glied dils virgs han purtav documents, fotografias, albums e cartas, singuls objects ed entiras collecziuns custeivlas. Aschia per exempel quella da Cristian Caduff permiert da Castrisch.

Actualmein, suenter otg onns, dat ei ina constanta en quei che pertucca las do-



Linard Candreia durant siu referat egl Archiv cultural Foppa.

FOTO RTR

naziuns che arrivin egl archiv. Dapi che quel exista ha el dil reminent retschiert era deposits. Per exempel ha gl’archiv dalla secziun Péz Terri dil CAS bardigliau ellas localitads digl ACF. Suenter ch’el era staus plirs decennis en ina casa privata a Glion ha el anflau in sottetg niev a Rueun. Igl ei ina rimnada zun custeivla che documentescha nuninterruttamein la historia dalla secziun dapi sia fundaziun gl’onn 1898. Tier il depositum s’audan ils cudischs dallas camonas Maighels e Terri, sco era quels dall’anteriura camona da Nagens.

Il «gelato» d’in emigrant da Pitasch

Da niev arrivin era documents che pertuccan la historia dall’emigrasiun sursilvana ella collecziun a Rueun. Dacuort ha *Linard Candreia* surdau ina part da sias archivalias privatas agl ACF. El ei staus presents alla radunonza generala ed ha referiu davart sia donaziun. El seigi in rimnader, ha Linard Candreia confessau al ravugl dalla radunonza generala digl ACF. El ha surdau denter auter documentaziuns che pertuccan emigrants grischuns e Romontschs ch’ein i viers l’Italia e viers la Russia. Aschia per

exempel in cudisch renomau ell’Italia, il «vocabulario del gelato». Igl ei in lexicon dil far glacé, in dicziunari dalla scienza e tecnologia dil «gelato artigianale», ina specia da bibla dallas corifeas dil «gelato» talian. Autur da quell’ovra ei Luca Caviezel da Catania. Igl ei in descendant d’Alexander Caviezel da Pitasch, quel haveva fundau gl’onn 1900 la «Pasticceria Svizzera» a Catania.

In drama a Sagogn

Sper quei ha el surdau agl ACF ina fotografia historica che mussa ils emploiai dalla firma Caflisch da Napoli, ina «pasticceria» che emigrants da Trin han fundau gl’onn 1825 el marcau al pei dil Vesuv. Medemamein ha il scribent che habitescha uss a Laufen el cantun Basilea Tiara surdau ina gronda fotografia historica agl archiv, igl ei quella d’in general da Sagogn. Ei seigi il scazi il pli custeivel, ha Linard Candreia declarau. Il putret dad 100 sin 80 cm muossa gl’um d’honur cun medaglias ed uordens vid il pèz. Mathias Murezi Padrun de Carné, nascius 1809 a Sagogn e morts 1891 ha passantau varga 50 onns ella Russia dils zars. El ha fatg ina carriera briglianta ed ei avanzaus sco inspectur general dallas scolas digl imperi russ. En connex cul post d’inspectur ha il zar nobilisau el. La sera dalla veta ha el passantau a Sagogn en sia casa paterna. Sia mort ei stada dra-

matica: Ina dumengia, duront ch’ils vischins eran en baselgia, ei in lader cumparius avon casa nua che Padrun seseva sin baun. Il malfatschent ha pretendiu daners. Padrun ha refusau aschia ch’il lader ha stilletau e blessau el. Suenter paucas jamnas ei il general morts dallas blesuras. Il lader ei mitschaut senza daners e senza fastigts.

Quella historia ha Linard Candreia era raquintau al ravugl dalla radunonza generala. Gl’autur ha scret bia davart ils emigrants sursilvans dils dus tschentaners vargai. El ha era visitau numerus loghens nua che quels ein stai activs. Agl archiv cultural ha el surdau plirs ordinaturs cun publicaziuns e recensius da quella tematica. Medemamein brevs originals d’emigrants dalla Foppa. Ils emigrants romontschs ein era in tema el roman «Der alte Russ» da Linard Candreia. Quella publicaziun trai en memoria las prestaziuns dils antenats e metta ellas en relaziun culla situaziun dad oz. Ussa seigi il material el dretg liug – aposte per quei intent, ha Linard Candreia declarau e surdau al president dil ACF, *Jan-Andrea Bernhard*, siu schenghetg.

Sonda proxima, ils 9-11-2024, envida gl’Archiv cultural Foppa al gi dallas portas aviartas. In e scadin ei envidaus da visitar quell’instituziun el-la casa da scola veglia a Rueun, via da Siat 2.